

摘藻堂四庫全書薈要

集部

欽定四庫全書薈要卷一萬五千二百十三

集部

山谷年譜卷二十七

宋 黃芻 撰

元符元年戊寅

先生是歲在黔州是春以避外兄張向之嫌遷戎州

按國史紹聖四年三月知宗正丞張向提舉夔

州路常平十二月壬寅詔涪州別駕黔州安置

黃庭堅移戎州安置以避使者親嫌故也又按

國史先生本傳云貶涪州別駕黔州安置言者

猶以處善地為屈法會避親遂移戎州又先生
作南園遁翁墓銘云庭堅以罪放黔中三年又
避親嫌遷置於戎州戎州今為叙

三月先生離黔州

按任氏注云山谷有與楊明叔大字跋尾云紹
聖五年三月哉生明涪翁時遷於夔道治舟開
元寺江西之間夔道即戎

三月中到涪陵

先生有答黎晦叔遲書云承寄惠長韻詩去年
三月中到涪陵乃得之又四月乙未為涪陵蘭
大節作朋樂堂記與楊明叔跋皆尚稱五年蓋
改元在六月耳又先生有與韋子駿提刑主客
三月二十三日書云庭堅居黔中衣食之須粗
給既又放徙一動百動所以少淹留此月半乃
得至涪陵又當為家弟少留 云云 又四月書云
區區西來以多病所至就醫藥又為涪陵家弟

少留是以行李稽遲

五月戊午上荔枝灘

見先生書韓退之符讀書城南云紹聖五年五月戊午上荔枝灘極熱云云

六月至戎州寓居南寺作槁木菴死灰寮後僦居城南名任運堂

先生有與王觀復書云泝流在道三月又有瀘州木龍巖題名云紹聖五年五月晦而所作章

明揚墓碣云元符之元夏六月明揚之子如璫
以書走戎州云云則是六月到戎州無疑又九
月八日答李長倩書云今寓居南寺乃當闌闔
中屋室差勝開元舊居但無復摩圍江山之勝
槁木菴見書遺道臻墨竹後與斌老題云元符
三年三月戎州無等院涪翁借地所築槁木菴
中書任運堂見書劉禹錫浪淘沙九首跋云元
符二年四月甲戌戎州城南僦舍任運堂中書

其任運堂有銘云或見僦居之小堂名任運恐
好事者多以藉口余曰騰騰和尚歌云今日任
運騰騰明日騰騰任運蓋取諸此余已身如槁
木心如死灰但不除鬚髮一無能老比丘尚不
可耶

重九日遊無等院

先生有題名云元符始元重九日同僧在純道
人唐履舉子蔡相張溥子相姪相步自無等院

登永安門游息此寺同僧惟鳳修義居泰宗善
觀甘泉甃井回乃見東坡老人題字低回其下
久之不能去責授涪州別駕戎州安置黃庭堅
魯直書

送曹黔南口號

亦有致語載外集

與黔倅張茂宗

按蜀本詩集注云山谷初到黔南曹譜伯達張

玠茂宗為守貳待之頗厚山谷與張叔和書云
庭堅至黔南將一月矣曹守張倅相待如骨肉
又與楊明叔書云守倅皆京洛人好事尚文不
易得也今先生有與大主簿三十三書亦云太
守曹供備譜濟陽之姪通判張玠張景儉孫公
休之妻弟皆賢雅相顧如骨肉前篇載外集後
篇載別集因賈使君詩以先後之次附見

贈黔南賈使君

按蜀本詩集注云賈使君蓋與曹伯達為代者
未知此詩何時所作姑附於離黔之歲又別本
注云信臣家世有北園在崆峒山下氣象雄壯
花木茂密信臣賈使君字也

放目亭賦

并序

序云黔江居士為之賦故附於黔江之末

元符二年己卯

先生是歲在戎州

先生題所和東坡與王慶源紅帶詩云後十二年觀此詩於戎州城南僦舍所謂吾猶昔人非昔人也元祐二年黃魯直元符二年涪翁題又有書簡公畫像贊後云元符二年壬戌樊道城南僦舍中書劉禹錫浪淘沙竹枝歌楊柳詞跋元符二年四月甲戌戎州城南僦舍任運堂中書按蜀本詩集注云九月知命如成都至明年二月還戎具山谷與知命書及答勾宗禹書又

與範長老書云知命顛倒饜足二月七日乃到
戎州今又以先生與李廣心主簿書攷之有云
知命到家不能三月復以舟載李慶韓十上成
都矣又有與弟姪書云知命將李慶韓十涪婢
粧奴往成都此但留牛郎并其乳母於此又云
去已兩月未有歸音

次韻雨絲雲鶴二首

按蜀本詩集注云蜀中舊本此詩序云代史夫

人和石信道按信道名諒時作瀘州江安令史夫人盖山谷外兄張祺子履之妻張祉介卿之嫂綠菜贊所謂維女博士史君炎玉者也此詩盖在戎州所作山谷有答蘇大通書曰頃見外兄張子履家嫂具道才德之美又曰昨史嫂過轅道云云此詩當是夫人與其子俱來乞子履墓銘時也雨絲雲鶴皆春時景物宜見於今年春山谷作子履墓銘葬以元符己卯之四月又

曰史夫人博學能文

從斌老乞苦筍

按蜀本詩集注云當是今歲夏初所作元年夏
初未至戎也此篇元在戎州詩中但序次不倫
耳山谷有苦筍賦云爇道苦筍冠冕兩川

次韻斌老所畫橫竹

次韻謝斌老送墨竹十二韻

用前韻謝子舟為予作風雨竹

再用前韻詠子舟所作竹

戲詠子舟畫兩竹兩鸚鵡

詠子舟小山叢竹

此篇元載別集

次韻黃斌老晚遊池亭二首

按蜀本詩集注云與黃斌老唱和諸詩並因苦
筍篇附見當是同時所作池亭詩有黃菊拒霜
殊未秋之句必今歲所作明年秋晚山谷蓋在

省城矣

次韻答斌老病起獨游東園二首

又和二首

又答斌老病愈遣悶二首

次韻斌老冬至書懷示子舟篇末見及之作因以

贈子舟歸

戲題斌老所作兩竹梢

奉次斌老送癭木棊局八韻

此三篇元載別集

對青竹賦

煎茶賦

苦筍賦

此三篇皆入蜀作

按蜀本石刻有苦筍賦跋云余生長江南里人
喜食苦筍試取而嘗之氣苦不可於鼻味苦不
可於舌故嘗屏之未始為客一設雅聞簡寂觀

有甜苦筍每過廬山常不值其時無以信其說
及來黔中黔人冬掘苦筍萌於土中才一寸許
味如蜜蔗而春則不食惟楚道食苦筍四十餘
日出土尺餘味猶甘苦相半覺班筍輩皆枯淡
少味蓋神農之所漏有莘庖聖所未達者耶故
作此賦以曉蜀人方苦筍時礮薑和醢然茅火
中而薦之日食百數至老不可食而後已未嘗
能作病也

戲答史應之三首

按蜀本詩集注云應之名鑄眉人客瀘戎間山谷有應之真贊云江安食不足江陽酒有餘江安屬瀘州漢江陽地也

筇竹

按蜀本詩集題作也足軒注云軒在簡州為師範道人作山谷有與範帖云知命欲往成都看藥市又云別作一篇竹軒頌似可觀已付密師

去可種竹於六祖即用之是歲範公自簡州受
成都六祖之請任注云範在簡州時山谷有種
竹頌徃在江南住竹山道人兩歲三來訪云云
故今云別作一篇

題榮州祖元大師此君軒

按蜀本詩集注云山谷此詩跋元符二年閏月
初吉書贈榮州琴師祖元按是歲閏九月又有
一篇亦此韻見於外集今外集無之有兩篇載

別集者今各隨年月而附

戲用題元上人此君軒詩韻奉答周彥公起予之作
病眼昏花句不及律書不成字

此篇元載別集

答李任道謝分豆粥

詩中有豆粥能祛晚瘴寒之句似是冬時所作
次韻任道雪中同游東臯之作

此篇元載別集

元符三年庚辰

徽廟登極先生是歲在戎州

先生有書韓愈送孟郊序與張大同跋元符三年正月丁酉甥雅州張大同治任將歸來乞書又云時涪翁自黔南遷於夔道三年矣寓舍在城南屠兒村側蓬藿柱宇鼪鼯同徑云云三月有供析狀云責授涪州別駕戎州安置黃庭堅準戎州公文準提刑司牒節文勘會正月十三

日登極大赦州縣散官編管人等並仰遂處分
析聞奏請詳此勘會責授安置始末事因開坐
回示以憑照會依赦文分析開奏者牒檢會昨
於紹聖元年十一月內準朝旨開封府陳留
縣聽候指揮至紹聖二年正月初八日授誥一
道左朝奉郎充集賢校理管勾亳州明道宮雲
騎尉賜緋魚袋黃庭堅朕以眇末紹承聖緒又
懼不能發揚先帝成功盛德曩詔儒學之臣論

次大典於以章示至公傳信萬世明明在上其
可厚誣爾庭堅擢於諸生使預著作罔念朝廷
之屬任專懷朋黨之私恩依憑國書疵詆先烈
變亂故實輕徇愛憎奏編累年公罔朕聽逮究
厥實語多無蹤覽之瞿然靡自寧處得罪宗廟
朕何敢容古有常刑宜即誅殛尚茲屈法聊示
竄投服我寬恩無忘自訟可特責授涪州別駕
黔州安置勲賜如故到紹聖五年二月十八日

準尚書刑部符準勅中書省尚書省備到提舉夔州路常平等事張向狀勘會黔州安置黃庭堅係向亡母之妹子切慮合該迴避奉聖旨黃庭堅移戎州安置所有責授安置始末事因開坐詣實即無漏落謹具狀申戎州謹狀元符三年三月日責授涪州別駕戎州安置黃庭堅狀三月知命歸江南

先生與範長老書云知命留此兩月三月十三

日解舟去知命不及到江南卒於荊州

五月復宣義郎監鄂州在城鹽稅

見先生辭免吏部員外郎狀又家藏先生與道
微使君手書真蹟云庭堅五月五日被告復宣
義郎添監鄂州鹽稅得不死於貶所又有俸祿
實已滿慰所望但已江漲未能下峽方欲拏舟
一至青神省張氏家姑乃漸治舟而東

五月戊寅賞鎖江荔枝

先生有題名云太守劉廣之率賓僚來賞鎖江

荔枝同來者廖琮致平張宗道原徐確天隱石

諒信道成節履中文

闕一字

少延禧慶崇

闕二字

南

玉元符三年五月戊寅黃庭堅魯直題柘枝頭

荔枝一本四柯西南一柯獨肉厚而味甘又六

月丙子作張仲吉綠陰堂記云今蒙恩放還去

此有日矣

已外追涼於安詔亭

按家藏先生書老杜詩真蹟跋云元符三年五月己卯樊道尉汲南玉置酒荔枝陰中同盤者廖致平石信道成履中史慶崇張晦叔楊中玉黃魯直食罷追涼於安詔亭投壺弈象置涼榻而卧南玉出天台紙緊滑宜書故書

七月泛舟往青神省見張氏姑

按蜀本詩集注云山谷既放還以江漲未能下峽西壩題名云爾七月自戎州行省其姑於青

神山谷之姑張社介卿之母介卿時為眉山青
神尉以七月二十一日解舟八月十一日抵青
神其與介卿書今又以次虎跳題名石刻叅攷
之其題云涪翁既作武昌鹽史會江漲不能下
峽乃拏舟至青神省姑氏元符三年七月辛卯
次虎跳王穎叔泉起擊毬釀酒同之者廖養正
兄弟姪五人楊咸孺祝有道道人慈元孫叔懃
泉起臨江作大樓閣舍西澗泉濺濺會於石渠

常作風雨聲久居城市至此令人忘歸它日松
竹成陰鑿坎種蓮乃盡之又有草李潮八分小
篆歌跋云元符三年七月二十三日余將至青
神云云

八月戊午與楊鞞祝林宗上巖寺

九月甲子與外弟張祉介卿赴蒲志同泰亭中巖
之約乙丑介卿及其兄姪邀煮茗於玉泉

並見游中巖行記

十月準告復奉議郎簽書定國軍節度判官廳公事

十一月自青神復還戎州

按蜀本詩集注云山谷與嘉州至樂山王子原十一月二十日書云到家悲苦滿懷蓋知命歸江南死於荊州當是初聞訃音也

十二月發戎州

按蜀本詩集注云十二月發戎州過江安為石

信道挽留遂作歲於此信道時為江安令已見
前注信道眉州人家於江津女嫁山谷之子是
歲十二月成親今以先生有書丹青引後攷之
其書云十二月癸卯余時解舟發熨道又有跋
所書梁甫吟後云元符三年十二月癸卯將發
戎州舟人湯瀦賽武侯久之不還艤船鎖江亭
下書山谷道人時聞復朝請郎知舒州而未被
受是日天大寒留滯追送之客廿許人在江滸

又有題東坡大字云元符三年十二月甲辰夕
天下雪而大寒呼酒解指券乃能書此則解舟
當在甲辰之後

贈知命弟離戎州

姪相隨知命舟行

十四弟歸洪州賦莫如兄弟四首

此詩年月不可考然有歸掃松楸下洒我萬里
涕之句必蜀中作元載外集今附於此十四弟

即天民

次韻奉答少激紀贈二首

按蜀本詩集注云少激名抗臨邛人時為戎州幕官予嘗見其家山谷諸詩真蹟因後篇附見
次韻文少激判官祈雨有感

按蜀本詩集注云此詩真本云伏承少激惠示
夏日祈雨有感之詩末句云愛民天子似仁宗
時徽宗皇帝初即位

次韻李任道晚飲鎖江亭

詩中有西來雪浪如魚烹之句當是初夏所作
再次韻兼簡履中南玉三首

次韻任道食荔枝有感三首

按蜀本詩集注云山谷有戎州鎖江磨崖留題
云元符三年五月戊寅太守劉廣之率賓僚來
賞鎖江荔枝山谷與姪樸書云初到戎彭道微
作守甚有親親之意道微既去劉滋崇儀作守

云云此詩蓋同時所作詩有六年怵悵荔枝紅之句蓋自紹聖二年乙亥入蜀至元符三年庚辰凡六見荔枝今已載鎖江題名在前注

以虎臂杖送李任道二首

此篇元載別集

廖致平送綠荔枝為戎州第一王公權荔枝綠酒亦為戎州第一

謝楊履道送銀茄四首

以時次為序

送石長卿太學秋補

詩中有漢文新覽天下圖謂徽考初立山谷有
試張通筆帖云戎州城南僦舍中眉山石長卿
觀書

次韻少激甘露降太守居桃葉上

詩語皆及徽考新政當是秋時所作

青神縣尉廳葺城頭舊屋作借景亭下瞰史家園

水竹終日寂然了無人迹又當大木綠陰之間
戲作長句奉呈信孺明府介卿少府

按蜀本詩集注云八月在青神尉廳作尉即張
祉介卿也祉父閭雅州人娶山谷之姑卒官太
常卿見山谷所作張子履墓誌

戲贈家安國

安國眉山人字復禮

次韻楊君全送酒長句

次韻君全送春花

謝楊景山承事送惠酒器

按蜀本詩集注云君全名琳景山名岳皆青神
人山谷有中巖題字云元符三年九月己巳王
元直攜酒帥楊君全景山酌張子謙介卿黃魯
直於慈姥人東堂此詩蓋是時所作故有秋入
園林花老眼之句綵花及酒當是重陽所送春
花言其象春時之花耳

應之送春花

按蜀本詩集作史彥昇送春花附楊君全送花
後詩有千林搖落照秋空之句

題石恪畫嘗醋翁

題石恪畫機織圖

此詩元載別集

謝應之

按蜀本詩集注云即史應之也往歲見山谷於

戎嘗以詩戲之此篇當是應之自眉來青神再
見山谷敘述往事故有去年席上蛟龍語未委
先生記得無之句山谷在青神有與眉山程信
孺帖應之在館時接從容賓主相樂也是歲來
自眉山可知

走筆謝王朴居士拄杖

按蜀本詩集云王朴字子厚隱居嘉州至樂山
此詩當是自青神回舟經涂所作詩有六年流

落放歸時之語

戲答王居七送文石

楊明叔從予學問甚有成當路無知音求為瀘州從事而不能得予蒙恩東歸用蛟龍得雲雨鵬鶚在秋天作十詩見餞因用其韻以別

按蜀本詩集注云按實錄元符三年十一月癸亥朔黃庭堅知舒州詩有老作同安守之句同安即舒州也

次韻石七三六言七首

詩云老境五十六翁又云欲行水繞山圍盖元符三年將出蜀所作石七三當是石信道家

以皮鞵底贈石推官二首


此篇元載別集已見石刻

山谷年譜卷二十七

謹案卷二十六第十五頁後五行庭堅書鐵龍爪
治河有同兒戲刊本脫龍字據別傳增

第二十一頁後三行為劉退夫臨寫蘭亭刊本寫
訛為據別本改





總校官庶吉士臣張能照

校對官學正臣李巖

謄錄監生臣于希賢

欽定四庫全書叢要

集部

山谷年譜卷二十八至三十

詳校官助教臣謝登雋



欽定四庫全書薈要卷一萬五千二百十四

集部

山谷年譜卷二十八

宋 黃榘 撰

建中靖國元年辛巳

先生是歲正月解舟江安

先生有書和晁元咎詩與斌老跋云元符三年十二月余嘗發戎州於百忙中為斌老書此卷建中靖國元年正月遣小使持此來追余於江安縣云云又有瀘州中興葛氏竹林留題云江

南黃庭堅自焚道蒙恩放還元符三年十月道
出江安江安宰石信道以親親見留作歲及作
瀘州開福寺彌勒殿銘跋云建中靖國元年正
月乙亥清輝閣前舟中書及有題所書魏鄭公
砥柱銘後云建中靖國元年正月庚寅繫舟王
市山谷老人燭下書

正月晦與合江令尹白宗愈原道汎安樂溪

見游瀘州合江縣安樂山行記

二月辛酉與太守高仲本游西山南浦庚寅游三
游洞

見南浦行記并題三游洞石刻

三月至峽準告復奉議郎權知舒州

四月至荆南又準尚書省劄子已降告命除吏部
員外郎乘遞馬發來赴闕

先生有書東坡思舊賦題跋云建中靖國元年
四月乙未早發峽州舟中書及題東坡字云建

中靖國元年五月乙巳觀於沙市舟中先生既
至荆南以病癰瘍初愈再具辭免乞江淮一合
入差遣遂寓家荆南有跋匹紙云十月戊子荆
州沙市舟中

六月二十三日準尚書省劄子奉聖旨不許辭免
已除吏部之命

見辭免狀載文集先生於是再具辭免并述前
狀嘗乞太平州無為軍一處及以亡弟哀惱伏

暑傷冷併作羸疾乞除江湖合入差遣一向遂
留荆南待命以至度歲

元師自榮州來追送余於瀘之江安綿水驛因復
用舊所賦此君軒詩韻贈之并簡元師從弟周
彥公

按此詩跋云余舊得東坡所作醉翁操善本嘗
對元道之元欣然曰往歲從成都通判陳君頎
得其譜遂促琴彈之詞與聲色相得也蜀人由

是有醉翁操然詞中之微旨弦外之餘韻俗指
塵耳豈易得之建中靖國元年正月辛未江安
水次偶住亭書此篇元載別集

萬州太守高仲本宿約遊岑公洞而夜雨連明戲
作二首

萬州之下巖唐末有劉道者定州無極人聞道於
雲居膺禪師為開巖第一祖法號道微自鑿石
龕曰死便藏龕中不用日時門人奉其命二百

年來遊者題詩不可勝讀莫能起此開巖者故予
作二篇表見之其一用楊子安韻其二用王定國韻
又戲題下巖

萬州下巖

此篇即用楊子安韻載文集五卷今附於此

戲題巫山縣用杜子美韻

詩中有江陵換袂衣之句

和王觀復洪駒父謁陳無已長句

按蜀本詩集注云王蕃字觀復沂公之裔官閬中時多以書尺至戎州從山谷問學至是自京師改官復入蜀會山谷於荊州時山谷病癰初愈答觀復簡云卧病二十餘日幾死者數矣忽奉手誨歡喜如從天上落也陳無已元符三年冬為祕書省正字故此詩有集賢學士見一角之語

跋子瞻和陶詩

先生有真蹟石刻題云建中靖國元年四月在
荊州承天寺觀此詩卷歎息彌日作小詩題其
後又子瞻謫嶺南彭澤千載人作淵明千載人
氣味乃相似作風味乃相似蜀本載之崇寧元
年今移附於此

次韻聞善

聞善名友聞居荆南蓋先生族伯父晦甫侍御
之子

次韻益修四弟

益修名友益聞善之弟

以峽州酒遺益修繼前韻

謝益修四弟送石屏

顏徒貧樂二首

顏徒名友顏益修之弟

次韻答黃與迪

次前韻謝與迪惠作竹五幅

戲答王觀復酴醿菊二首

戲答王子予送凌風翁二首

四篇以時序為次子予時僑寓荊州

謝王子予送橄欖

以椰子小冠送子予

呈楊康國

又戲呈康國

二詩皆言黃柑未熟

次韻馬荊州

詩中有茱糝菊英同送秋之句

和中玉使君晚秋開天寧節道場

徽廟以十月十日誕降為天寧節開啓蓋九月

十日

入窮巷謁李材叟翹叟戲贈兼簡田子平三首

詩中有紫冠黃鈿網絲窠之句

戲簡朱公武劉邦直田子平五首

朱劉田皆荆南人詩有葵莧秋之句

戲呈田子平六言

此篇元載外集詩中有荊州衣冠千戶厚意獨
有田郎之句

戲贈米元章二首

按蜀本詩集注云米芾字元章為發運司屬官
在江淮間建中靖國之秋東坡北還常有手帖
與之此詩似亦當時所作蓋詩中有滄江書畫

船之句今附見

次韻錢德循鹿苑灘艤舟有作

詩中有已聽荊州漁鼓鳴之句

此篇元載別集

病起荊江亭即事十首

詩中有大聖天子初元年及西風吹淚古藤州之句又是歲七月東坡卒於常州而此詩猶未及之當是初秋所作

荊州即事藥名詩八首

此八篇元載外集

以古銅壺送王觀復

鄒松滋寄苦竹泉根麴蓮子湯三首

松滋隸荊南詩中有新收千百秋蓮的之句

次韻答馬中玉三首

次韻中玉梅三首

次韻中玉水仙花二首

王充道送水仙花五十枝欣然會心為之作詠

吳君送水仙花并二大本

劉邦直送早梅水仙花三首

劉邦直送水仙花

謝檀敦信送柑子

贈李輔聖

和高仲本喜相見

詩中有雪滿荊州喜再逢之句

戲詠暖足餅二首

此以時敘為次

戲呈聞善二兄

謝答聞善二兄九絕句

當乾道之末隨侍先人官荊州得見族伯祖晦
甫侍御位族伯父仲賁名楸仲賁嘗言先生既
與侍御位諸子為昆弟視聞善為兄聞善酗酒
山谷詩篇中多形勸戒聞善每飲酒至醉往往

坐不肯起一夕赴姻家柳氏夜集既散聞善復
坐不歸柳氏亦告酒盡但有一甕酒未堪窮聞
善聞之喜甚亟造其梱內直抵甕下聞善病酒
疥尋常旁坐者亦病之聞善即以兩手輓甕中
柳氏子弟中真有意欲毆之者坐客勸曰酒已
壞矣曷若使之盡歡可乎柳氏且怒且笑不免
取而酌之聞善大喜狂歌盡醉而去故先生詩
中有疥手輓甕庸何傷及柳家兄弟太迫窄之

句蓋紀一時之實耳又先生有書贈聞善飲酒
詩後云徃時族中多營於酒二十年間兩還故
里見子弟皆恂恂憂讓醉而溫恭中竊自喜黃
氏諸子之遺慶深長諸少年尚承其風澤時有
興發者耶因子立乞書書九詩可與族中觀知
酒之利病如此

戲呈聞善

題子瞻畫竹石

按蜀本詩集注云舊題云題全天粹所收子瞻
竹石天粹名壁山谷在荊州時有與天粹帖又
有字說云全壁長林人長林屬荊門軍此詩當
附見於荊州詩中

次韻向和卿行松滋縣與鄒天錫夜語南極亭二
首

詩中有提壺及思歸樂之句

木龜亭留題

題羅公山古柏菴二首

詩中有會向天階乞衰晚之句二詩未詳地名
恐是蜀中或湖外所作今附於此並元載別集

山谷年譜卷二十八

欽定四庫全書薈要卷一萬五千二百十五

集部

山谷年譜卷二十九

宋 黃芻 撰

崇寧元年壬午

先生是歲在荆南

先生有正月與子由書云兩三日即拏舟下巴陵出陸至雙井六日耳遂由雙井往萍鄉省伯氏元明

正月二十三日發荊州二十六日至巴陵

先生與天民嗣文二弟書云老夫正月二十三
日發荊州又有手書雨中登岳陽樓望君山二
詩跋云崇寧之元正月二十三夜發荊州二十
六日至巴陵數日陰雨不可出二月朔旦獨上
岳陽樓太守楊器之監郡黃彥并來率同游君
山行二十里螺蚌中乃至見住持僧年八十跋
曳而出登其絕頂環望積水數百里實壯觀也
有野馬二十餘羣游平澤中猿猴輩出上下松

楠間景氣甚野

二月初六日至通城

亦具所與天民嗣文書老夫今日至通城之法
興道中幸健即相見悲喜相半今遣王清走報
黃龍脩上各不過住二日耳書末題二月初六
日

三月巳卯寓萬載廣慧道場

先生有跋陳甘休所收舊字云崇寧元年三月

己卯自分寧來宿萬載之廣慧道場按長歷己卯蓋二十四日

四月乙酉到萍鄉

按萍鄉壁記云杭荆江略洞庭涉脩水經七十里二渡出萬載宜春來省伯氏於萍鄉來以崇寧元年四月乙酉去以是月之己亥乙酉蓋四月朔又己丑飯於萍鄉護法院見書船子和尚歌後

是月丁未登吳叔元秀江亭

亭在新喻有題名石刻云朝奉郎新當涂假守
黃庭堅崇寧元年四月丁未來訪叔元晚登秀
江亭澄波古木使人得意於塵垢之外蓋人閑
景幽兩奇絕耳

五月一日過筠州

先生有與七兄長官書云庭堅到臨江及筠以
親舊皆留兩日筠亦以張九微凍着不欲拖拽

上道幸夜來已安今早遂行書末題五月初一日又批云初一日五鼓元字又有題胡氏所憩亭壁云山谷老人稅駕而飯嘉作亭之意為書此榜崇寧之元五月之吉實乙卯黃庭堅云

是月到江州十七日猶在展畫亭

按西林寺題壁云黃庭堅弟叔豹姪柄子相及朱章劉義仲李彭同來瞻永禪師塑像觀碑陰顏魯公題字愛碧甃流泉凌厲暑氣裊回不能

去崇寧元年五月癸亥及題太平觀壁云黃庭
堅自江西來會王宰朱章道士湯居善周虛已
於此堂觀四山急雨草木皆成聲崇寧元年五
月甲子時發東林又有雲巖海公院宰書其末
題五月十七日江州展畫亭及息心名跋云崇
寧元年五月十七日江州展畫亭又有草書跋
云崇寧元年五月十七日湓浦展畫亭睡覺為
道淳上座作草以滌餘困其暫留江州蓋待嗣

文節推弟般家同赴任具先生與洪龜父書云
四十及新婦在荆南已遣十六節推弟往取船
來會江州矣嗣文名叔豹第十六蓋給事長子
二十日過湖口

見先生追和東坡壺中九華詩注

是月繫舟於大雲倉之達觀臺下

先生有手書奉題伯時所作陽關圖跋云元祐
初作此詩題伯時所作陽關圖崇寧元年五月

見此草於趙升叔家殊妙於定本升叔伯時壻也時俱繫舟於大雲倉之達觀臺下

六月初九日領太平州事九日而罷

按國史崇寧元年五月庚午司馬光而下四十人追奪降黜有差孔平仲畢仲游徐常黃庭堅晁補之韓岐王鞏劉當時常安民黃隱張保源並送吏部與合入差遣仍令吏部依條差注施行詔在乙亥先生有與徐師川書云老舅六

月九日領太平事十七日奉朝旨送吏部即日
解船至江口以嗣文同行遂為遠別亦大風不
可行留連方欲決去會駒父奉其大母來又為
之留七日閏月十一日分手亦衝東風至蕪湖
矣又按于湖居士張公孝祥作高侍郎夫人王
氏墓誌載侍郎諱衛及與元祐諸公游嘉言懿
行太夫人悉能記之侍郎為太平州判官攝州
事山谷來為守謫久貧甚既入境矣復坐黨事

免侍郎得堂帖不以告迎候如禮山谷既視印
已乃知之侍郎為治歸裝甚飭備過於久所事
觀此則冷齋夜話所稱徐師川言予於東坡山
谷瑩中三君子俱知敬畏然其疵瑕予能笑之
謂東坡欲學長生瑩中對日者談命山谷赴官
姑孰聞罷而俯就其說之妄益可見矣

七月甲午復繫舟達觀臺下

先生有跋草書後云崇寧元年七月甲午繫舟

達觀臺下待舒城音問朝涼戲作此卷

八月復至江州

先生罷太平後裴回於江州將復過荆南謀居
然竟留於鄂州亦見徐師川書云將家到荆南
謀居云云詳見後注又先生有跋自書東坡乳
泉賦云紫極宮道士胡洞微明之少入道於廬
山康王觀嘗從容趨事余伯祖父寶之寶之人
豪也少名茂先故徃時江淮之間詩云江南黃

茂先江北段少連明之猶能道其言論風旨故
其見余喜甚相從忽忘日暮也東坡公所作乳
泉賦數百年之文章也明之又好東坡故書遺
之可深藏以待識者崇寧元年八月己未泊舟
琵琶亭西書又先生有跋登江州百花亭詩云
崇寧元年八月壬戌來集斯亭己未蓋初七日

九月至鄂州

先生有跋元祐間與三姪太君帖云崇寧元年

九月甲申繫舟繁口庭堅題甲申蓋十二日

次韻答高子勉十首

高荷字子勉荊州人而此詩有春從細草回之句當是春初所作

贈高子勉四首

再用前韻贈子勉四首

詩中有鳥語花中管弦之句春稍動矣

荆南簽判向和卿用予六言見惠次韻奉酬四首

蟻蝶圖

謝人送栗鼠尾畫維摩二首

戲答荊州王充道烹茶四首

已上當是未離荊州所作

雨中登岳陽樓望君山二首

此詩有跋已具前注

自巴陵略平江臨湘入通城無日不雨至黃龍奉
謁清禪師繼而晚晴邂逅禪客戴道純款語作

長句呈道純

按蜀本詩集注云巴陵平江臨湘皆屬岳州通
城屬鄂州黃龍山在分寧李彤季敵書豫章集
後云先生自巴陵取道通城入黃龍山為清禪
師徧閱南昌集自有去取即此時也

觀化詩十五首

并序

此詩元載外集其間詩中有流落來從綿上州
之句且多言鄉里景物故附於此

題徐氏書院

徐氏即徐禧德占

題胡逸老致虛菴

題蓮花寺

衝雨向萬載道中得逍遙觀遂託宿戲題

此詩往萍鄉時所作萬載屬袁州

題竹尊者軒

送密老住五峯

按蜀本詩集注云山谷有為密公作草書跋尾
云元年三月壬午旅寓宜春之開元飯崇聖密
公之堂即此僧也壬午蓋二十七日宜春屬袁
州

新喻道中寄元明用觴字韻

此詩自萍鄉歸涂所作新喻屬臨江軍

次韻子瞻和太白潯陽紫極宮感秋詩韻

追懷子瞻太白

瓊芝軒

龜殼軒

秋聲軒

三篇皆紫極宮所作

濂溪詩

按濂溪先生故居去江州城不數里溪在故居
今附於此見載文集

戲効禪月作遠公詠

按蜀本詩集注云遠公道場即今江州廬山東林寺是歲八月庚申山谷有東林題名此詩當是同時所作庚申蓋初八日

湖口人李正臣蓄異石九峯東坡先生名曰壺中九華并為作詩後八年自海外歸過湖口石已為好事者所取乃和前篇以為笑實建中靖國元年四月十六日明年當崇寧之元五月二十日庭堅繫舟湖口李正臣持此詩來石既不可

復見東坡亦下世矣感歎不足因次前韻

書郭功甫家屏上東坡所作竹

按家藏先生此詩真蹟題云次韻東坡先生屏
間墨竹止此六句但草不春作草偃風一暴終
玉局作一壺瓊房第幾間作琳房并有功甫跋
語云東坡作於予家漆屏之上觀魯直之詩可
以見其髣髴矣功甫蓋太平州人

太平州作二首

按家藏先生真蹟前一首題云戲作觀舞絕句
奉呈功甫兄又片片梨花雨作細點梨花雨

三篇元載外集

罷姑孰寄元明用觴字韻

武昌松風閣

按蜀本詩集注云此詩經涂所作今尺牘中有
跋與李德叟書云崇寧元年九月甲申繫舟繁
口題時張文潛再謫黃州猶未至也故詩有張

侯何時到眼前之句今按國史崇寧元年七月
庚戌主管亳州明道宮張耒責授房州別駕黃
州安置而文潛謝表云已於九月三日到黃州
公參訖

次韻文潛

和文潛舟中所題

按蜀本詩集注云二詩並次前篇時文潛已到
黃山谷自鄂往見之前詩中有風雪牖戶勤塞

向之句蓋冬深所作

題君子泉

泉在黃州

宿黃州觀音院鐘樓上

按蜀本詩集注云元在次韻文潛後詩有潘何之語今遷於此為後詩張本

謝何十三送蟹

按蜀本詩集注云何十三當是何頡之斯舉或

其弟兄誦之蓋黃州人集中又有三詩見於脩
水集者亦附見其一又借答送蟹韻并戲小何
云草泥本自行郭索玉人為開桃李顏恐是曹
瞞說雞肋不比東阿舉肉山其二代二螯解嘲
云仙儒昔日卷龜殼蛤蜊自可洗愁顏不比二
螯風味好那堪把酒對西山其三又借前韻見
意云招潮瘦惡無永味海鏡纖毫只強顏想見
霜臍當大嚼夢回雪壓摩圍山今豫章集皆不

載今併附見何十三名覲

次韻文潛立春日三絕句

再次前韻

按蜀本詩集注云按長歷是歲十二月二十一日立春明年春時山谷已歸鄂故詩中有已發黃州首更回之句

崇寧二年癸未

先生是歲留鄂州

先生有四月二十二日與張叔和通判書云庭
堅罷太平即寓鄂渚會范德儒謫來即謀居漢
陽繼而安厚卿來遂營居九江將登舟矣德孺
以散官安置衆議以為自下礙責降充宮觀人
不得同州指揮遂定居耳按國史正月己酉范
純粹常州別駕鄂州安置是時先生已管句洪
州玉隆宮

十一月有宜州謫命

按國史先生本傳庭堅在河北與趙挺之有小
怨挺之執政轉運判官陳舉承風旨上其荆南
所作承天塔記指為幸災復除名羈管宜州

嘗昔聞荊州族伯父仲賁嘗言為兒童時乃
識先生備聞諸父聞善益修諒正話及目擊
當時之事筆記甚詳仲賁有跋承天塔記云
先生初自蜀出峽留荊州待辭免乞郡之命
與府帥馬城忠玉相從歡甚閩人陳舉自臺

察出為轉運判官先生未嘗與之交也承天
寺僧智珠造七級浮圖乞記於先生一日記
成忠王飯諸部使者於浮圖下環觀先生書
碑先生於碑尾但云作記者朝奉郎新知舒
州事豫章黃庭堅立石者承議郎知府事荏
平馬城而已舉與轉運判官李植提舉常平
林虞相顧遽請於前曰某等願記名不朽可
乎先生不答舉由此憾之舉知先生昔在河

北與趙挺之有怨挺之執政遂以墨本走介
獻於朝廷謂幸災謗國先生遂除名羈置宜
州忠玉亦以辰州徭賊寇邊監察御史席震
繼而劾之奪官羈置海州遂俱沒於貶所嗚
呼其亦不幸甚矣其後不踰年挺之去位而
舉因指青蟲為龍物奏為祥瑞遂坐欺罔誠
足以為小人陷君子之戒今併附見

十二月十九日夜中發鄂渚曉泊漢陽親舊追送

按蜀本詩集注云是歲山谷在鄂州既而謫宜
州十二月十九日發鄂渚至岳陽作歲而所注
乙丑越洞庭丙寅渡青草之句謂是明年二月
二十一日二十二日今以先生跋苦寒吟考之
其跋云開封張德潤號為有急難之義予晚識
之於長沙名不虛得也泊船驛步門與德潤官
廨相近時時相過奔走予所闕如有人挽其前
推其後也它日持此卷來乞書會舟子作歲除

未能行舟中無它緣偶得意書盡崇寧二年十
二月晦此真蹟見藏晉陵尤氏既歲暮到長沙
則過洞庭青草當在此月二十以後不應在岳
陽作歲若以國史考之十二月丙寅為二十一
日雖注引先生與人帖云庭堅治行已有緒既
嫁女別無一事移舟漢陽留數日待親戚之在
旁近耳此帖不注月日今秘館中有先生遺文
內有此書乃是與文舉書其書尾云十一月二

十七日自二十七日推之恐鄂州必無兩旬之
留亦或十九日傳寫之誤或是初九日亦未可
知先生舟行往往不舍晝夜此既夜發鄂渚而
先離荊州亦是二十三夜已載手書君山詩跋
兼先生次年有與李樂道書云十一月末不肖
蒙恩活之宜州即發船過漢陽軍或是先欲留
漢陽數日走到長沙況當時士勢不應聞命之
後留兩月度歲又先生有禮思大師題名乃崇

寧三年正月甲辰甲辰為正月晦思大師道場
在衡山福嚴又先生有書法輪古碑後跋云崇
寧三年二月丙寅脩水黃庭堅書法輪在南嶽
見有石刻詳見後注則非一月丙寅過青草湖
矣

崇寧二年正月己丑夢東坡先生於寒溪西山之
間予誦寄元明觴字韻詩數篇東坡笑曰公詩
更進於曩時因和予一篇語意清奇予擊節賞

歎東坡亦自喜於九曲嶺道中連誦數過遂得之

己丑蓋九日

病來十日不舉酒二首

詩中有回施青春與後生之句當是春時所作

題小景扇

鄂州南樓書事四首

詩中有我亦來追五月涼之句山谷在鄂州作

夏惟此年耳

南樓畫閣觀方公悅二小詩戲次韻

庭堅以去歲九月至鄂州登南樓歎其制作之美
成長句久欲寄遠因循至今書呈公悅

養鬪雞

和涼軒二首

以時序為次詩有西風為解紛之語

題默軒和遵老

題楊道人默軒

此篇元載外集

次韻文安國紀夢

寄賀方回

鄂州節推陳榮緒惠示泂檄崇陽道中六詩老嬾
不能追韻輒自取韻奉和

頭陀寺

道中聞松聲

中秋山行懷子興節判

再登蓮落嶺懷君澤知錄

崇陽道中

晚發咸寧行松徑至蘆子

陳榮緒惠示之字韻詩推獎過實非所敢當輒次
前韻三首

山谷年譜卷二十九

欽定四庫全書薈要卷一萬五千二百十六

集部

山谷年譜卷三十

宋 黃芑 撰

崇寧二年癸未

德孺五丈和之字詩韻難而愈工輒復和成可發

一笑

按蜀本詩集云按實錄崇寧元年十月管句南
京鴻慶宮范純粹鄂州居住二年又責常州別
駕鄂州安置

次韻德孺五丈新居病起

次韻德孺五丈感興二首

次韻德孺五丈惠貺秋字之句

范德孺需筆裒諸工佳者共成十枝分送

此篇元載別集

求范子默染鴉青紙二首

子默德孺之子

謝榮緒惠貺鮮鯽

謝榮緒割愛見貽二首

具執中有兩鵝為余烹之戲贈

秋冬之間鄂渚絕市無蟹今日偶得數枚吐沫相濡乃可憫笑戲成小詩三首

以題中時序為次

甯子興追和予岳陽樓詩復次韻二首

和甯子興白鹿寺

謝人惠猫兒頭筍

詩中有鸚鵡洲前人未知之句蓋謂未離鄂州時也

以酒渴愛江清作五小詩寄廖明略學士魚簡初和甫主簿

詩中有將發沔鄂間之句

四休居士詩三首

十二月十九日夜中發鄂渚曉泊漢陽親舊攜酒追送聊為短句

次韻陳榮緒同倚鍾樓晚望別後明日見寄之作
詩中有青草枯松之句皆岳州事蓋榮緒送山
谷至岳尚未過湖也

過洞庭青草湖

過土山寨

按南行錄湖中有土山巡檢去黃陵廟十五里
晚泊長沙示秦處度范元實用寄明略和父韻五
首

長沙即潭州在洞庭之南

次韻元實病目

右自洞庭青草湖至此詩蜀本載於明年今移
附於此

題李亮功家周昉畫美人琴阮圖

按高子勉記龍眠李亮功家藏周昉畫美人琴
阮圖兼有宮禁氣象旁有竹馬小兒欲折檻前
柳者亮功官長沙而山谷謫宜州過見之歎愛

彌日大書一詩於黃素上云云亮功名寅

此篇元載別集

題李亮功戴嵩牛圖

題和東坡先生題李亮功歸來圖

二詩蜀本詩集舊載於崇寧元年潯陽諸詩之
後今移附於此

次韻寄藍六在廣陵

再和寄藍六

寄懷藍六在延年

三詩元載外集詩中有傳聲為向揚州問相憶
猶能把酒不及追思二十年前事之句先生甲
子歲嘗寓揚州故附於此

文安國挽詞二首

因前篇有記夢詩故附於此

史天林中散挽詞

宋夫人挽詞

此二篇元載別集

崇寧三年甲申

先生是歲在潭州歷衡州永州全州靜江府

舊為桂州以

趨貶所

正月晦過衡山

先生有禮福嚴寺思大師題名云正月甲辰按

長歷甲辰蓋晦日

三月己卯泊浯溪

見中興詩頌引三月己卯風雨中來泊浯溪按
長歷己卯蓋初六日

十四日到永州

先生有與李樂道書云三月十四日到零陵不
肖本欲寄家桂林而家中堅欲相隨到貶所至
零陵已大熱骨肉不可復將行因盡室留零陵
零陵即永州

四月發全州是夏至宜州

先生有跋自書嬾瓚和尚歌後云四月辛未余將發清湘矣楊唐老乞書大暑天雨體煩眼花書不成字兼後注李資深書卷跋則是先生至宜在五月六月之間

十一月甲戌遷居於城南

先生跋資深書卷云崇寧三年十一月余謫處宜州半載矣官司謂余不當居關城中乃以是月甲戌抱被入宿於城南予所僦舍喧寂齋雖

上雨傍風無有蓋障市聲喧憤人以為不堪其
憂余以為家本農桑使不從進士則田中廬舍
如是又何不堪其憂耶既設卧榻焚香而坐與
西隣屠牛之机相直為資深書此卷實用三錢
買雞毛筆書

十二月二十七日伯氏元明自永興唐次公俱來
先生乙酉家乘云正月庚午朔元明自永州與
唐次公俱來居四日矣家乘蓋先生日記按范

信中有乙酉家乘序云崇寧甲申秋余客建康
聞山谷先生謫居嶺表恨不識之遂泝大江歷
湓浦舍舟於洞庭取道荆湘以趨八桂至乙酉
三月十四日始達宜州寓宿崇寧寺翌日謁先
生於僦舍望之真謫仙人也於是忘其道塗之
勞亦不知瘡癘之可畏耳自此日奉杖屨至五
月七日同徙居於南樓圍碁誦書對榻夜語舉
酒浩歌跬步不相舍凡賓客往來親舊書信晦

明寒暑出入起居先生皆親筆以記其事名之

曰乙酉家乘而其字畫特妙嘗謂余他日北歸當以此奉遺至九月先生忽以疾不起子弟無一人在側獨余為經理其後事及蓋棺於南樓之上方悲慟不能已所謂家乘者倉卒為人持去至今思之以為恨也紹興癸丑歲有故人忽錄以見寄不謂此書尚爾無恙耶讀之恍然幾如隔世因鏤板以傳諸好事亦可以見先生雖

遷謫處憂患而未曾戚戚也視韓退之柳子厚
有間矣東坡云御風騎氣與造物游信不虛語
哉甲寅四月望日蜀郡范寥信中序

長沙留別

此篇元載外集

勝業寺悅亭

按南行錄勝業寺在南嶽廟東屬潭州衡山縣
有柳子厚般舟和尚第二碑

離福巖

按南行錄福巖在南嶽依巖架空為之蓋思空道場有三生塔亦屬衡山縣

贈益陽成之主簿

并引

引中云余之竄嶺南道出衡陽見主簿君益陽黃成之問宗派乃同世出祖兄也

此篇元載別集

花光仲仁出蘇秦詩卷思兩國士不可復見開卷

絕歎因花光為我作梅數枝及畫煙外遠山追
少時韻記卷末

花光寺在衡州經涂所作

題花光畫

題花光畫山水

所住堂

題高節亭邊山礬花二首

并引

贈花光老

題花光為曾公卷作水邊梅

二篇元載外集

贈惠洪

詩中有眼橫湘水暮之句

贈惠洪

此篇載外集曾端伯謂非先生所作王父亦嘗
刪去漫附於此

戲詠零陵李宗古居士家馴鷓鴣二首

零陵即永州經涂所作

李宗古出示謝李道人苕帚杖從蔣彥回乞塋地
二頌作二詩奉呈

書磨崖碑後

按先生有真蹟石刻題云崇寧三年己卯風雨
中來泊浯溪進士陶豫李格僧伯新道遵同至
中興頌崖下明日居士蔣大年石君豫大醫成
權及其姪逸僧守能志觀德清義明崇廣俱來

又明日蕭裒及其弟裒來三日裒回崖次請予
賦詩老矣豈復能文強作數語惜秦少游下世
不得此妙墨劉之崖石耳又按王仲言揮麈後
錄云崇寧三年太史赴宜州貶所是時外舅曾
空青坐鉤黨先徙是郡太史留連踰月極其歡
洽相予酬倡如江樾書事之類帥游浯溪觀中
興碑太史賦詩書姓名於左外祖急止之曰公
詩文一出即日傳播某方為流人豈可出郊公

又遂徙蔡元長當軸豈可不過為之防耶太史
從之但詩中言亦有文士相追隨蓋為外祖而
設空青即公卷名紆

浯溪圖

太平寺慈氏閣

元注晚與曾公卷同登

題淡山巖二首

明遠菴

去年三月清明蔣彥回喜太守監郡過其玉芝園
作詩十六韻二侯皆有報章今年三月余到玉
芝園記錄一時次其舊韻

三月辛丑同徐靖國到愚溪過羅氏脩竹園入朝
陽洞蔣彥回陶介石僧崇廣及余子相步及余
於朝陽巖褰回水濱久之有白雲出洞中散漫
洞口咫尺欲不見介石請作五字記之

代書寄翠巖新禪師

詩中雖有早梅開之句不可作時節會也

戲答歐陽誠發奉議謝余送茶歌

到桂州

答許覺之惠桂花椰子茶盃二首

覺之名彥先

以椰子茶瓶寄上德孺二首

寄黃龍清老三首

詩中有中秋月之句秋時所作

贈法輪齊公

法輪即南嶽岵嶺峯龍雲寺先生有重書法輪
古碑跋云大明本名惠遠思大禪師之孫與虞
世南李百藥岑文本為方外之友三人皆為作
碑銘幸岑中書之文僅存又為不解事僧傳於
石刻敗剝之後幾不可讀矣而法輪寺住持禪
師景齊來求余判定且乞書而刊之師金陵蔣
山中人嘗入余方外之師晦堂心公之室謂我

為同門盖嘗叅字說於王荆公其人通達辨識
欲有所立人不能傾也故欣然為之書法輪寺
自晉至唐正觀中雖既廢復興皆號龍雲寺中
間改號金輪而無文記可尋意武后時所改耳
其號法輪則太平興國五年勅書也崇寧三年
二月丙寅脩水黃庭堅書今以歲月附見
此詩元載別集

崇寧四年乙酉

先生是歲在宜州

二月六日與諸人飲餞元明於十八里津

見乙酉家乘又二十六日得元明二月十四日

丁卯書寄詩一篇青玉案一篇

三月十五日成都范寥乘相訪

寥字信中見乙酉家乘

五月初七日癸卯自此宿南樓范信中同之

見乙酉家乘又先生有題東坡小字兩軸云崇

寧四年五月丙午觀於宜州南樓按誠齋先生
楊公萬里嘗作宜州山谷先生祠堂記云予去
年十月致書桂林伯侍講張公今乃得報且誨
予曰宜州太守韓侯璧直諒士也初抵官下他
皆未遑首新山谷先生祠堂盖山谷之貶宜州
崇寧甲申也館於城之戍樓曰小南門者明年
卒焉後人表之即其地廟祀之于湖張安國大
書豫章先生四字以揚之然居向湫隘屋廬壞

隕俎不成列拜靡厝躬今侯戾止碩瞻而賓爰
出其闔距城不遐得地洵盱湖光前陳曠野洞
開諸峯崛竒駿奔來庭立屋六楹以妥神居刻
木肖象是似是享俯湖為閣於登於臨湖山清
空雲煙高寒神則降集人士奮豫既成來求閣
名若記栻既以清風名閣矣子學詩山谷者微
子莫宜記之予執書歎曰予聞山谷之始至宜
州也有眚某氏館之太守抵之罪有浮屠某氏

館之又抵之罪有逆旅某氏館之又抵之罪館
於戍樓蓋圉之也卒於所館蓋饑寒之也先生
之貶得罪於時宰也亦得罪於太守乎鹿之肉
人之食君子之殘小人之資也孰使先生之所
挾足以授小人之資也哉夫豈不得罪於太守
也先生得罪於太守則太守不得罪於時宰矣
豈惟不得罪也又將取榮焉由今視之其取榮
於當時者幾何而先生饑寒窮死之地今乃為

騷人文士佇瞻鑽仰之場來者思而去者懷而
所謂太守者猶有臭焉則君子之於小人患不
得罪耳得罪奚患哉今韓侯之賢乃能社先生
而稷之惜也先生之前乎韓侯也先生之沒侯
猶敬之如此使其生也遇侯而燠休之則主賓
之賢牽聯俱傳也惜也韓侯之後乎先生也然
士或同室而睽或異世而逢苟逢矣前後足校
哉先生之祠要自韓侯始則韓之傳決也而又

得侍講張公名其閣其傳益決也因書其說寄
侍講以遺韓侯云今附於遷居南樓之後

六月辛巳游龍隱洞

先生有龍水城南帖云邵彥明置酒招余及華
陽范信中龍城歐陽佃夫約清旦會於龍隱洞
余三人借馬自南樓來至則彥明及其弟彥昇
在焉云云彥明者臨淮邵華彥昇兄也信中名
寥佃夫名襄余者江西之脩水黃庭堅魯直時

崇寧四年六月辛巳

予去歲在長沙數與處度元實相從把酒自過嶺
來不復有此樂感歎之餘戲成一絕

處度名湛元實名溫此篇元載別集今附是歲
宜陽別元明用觴字韻

元明留別

此篇元載外集

信中遠來相訪且致今歲新茗又枉任道寄佳篇

復次韻呈信中兼簡任道

此篇元載別集

和范信中寓居崇寧遇雨二首

按蜀本詩集注云此詩亦四年夏所作

乞鍾乳於曾公卷

按蜀本詩集注云豫章後集有與公卷書云鍾乳何時再成又云嶺南秋暑殊未解此詩蓋秋時所作或遂絕筆於此篇歟

九月三十日先生卒

按國史九月五日奉御筆手詔元祐姦黨詆訕
先帝罪在不赦曩屈臺憲貸與之生斥之遠方
固無還理終身貶所豈不為宜今先烈紹興年
穀豐稔鑄鼎以安廟社作樂以協神人嘉祥淳
臻和氣昭格肆頒赦宥覃及萬方興言邦誣久
責遐裔一夫失所朕尚惻然用示至仁稍從內
徙服我寬德其革爾心應姦黨羈管編配安置

居住在廣南者與移荆湖南北在荆湖者移江
淮其餘並移近裏惟不得至四輔畿內後批崇
寧元年九月十六日送進奏院遍牒行下明年
正月庚戌劉摯而下敘復有差先生在輕第二
等之首並敘復令吏部與監廟差遣而先生皆
不及拜命故先生本傳云三年徙永州未聞命
而卒紹興初高宗皇帝中興特贈先生直龍圖
閣官子孫各一人二年先祖尚書以給事中召

至行在齋家藏先祖親筆日記載二月初六日

戊辰後殿引對天語甚溫詢先生子孫曲折許
他日召至行在及於七日己卯午刻中使鄭謨
傳宣至先祖遂就省中見之上令問先生諸孫
曲折先祖即因謨附口回奏當時特贈實與張
耒晁補之秦觀四人同命詞云勅故朝奉郎黃
庭堅等自熙寧大臣用事變法始以異同排斥
士大夫維我神祖念之不忘元豐之末稍稍收

名接於元祐英俊盈朝而爾四人以文采風流
為一時冠學者欣慕之及繼述之論起黨籍之
禁行而爾四人每為罪首則學者以其言為諱
自是以來搢紳道喪綱紀日隳馴致宣和之亂
言之可為痛心肆朕纂承既從昭洗今爾四人
復加褒贈斯足以見朕志矣嗚呼西清之遊書
殿之選惟爾曹為稱使生而得用能盡其才亦
何止於是歟舉以追命聊伸齋志之恨亦以稍


慰天下士大夫之心英爽不亡歆此休顯蓋詞
臣推廣高廟聖意及之後之子孫伏讀褒訓銜
戴國恩欲報無路何但痛哭流涕而已因輒附
諸篇末

山谷年譜卷三十

謹案卷二十八第一頁前四行解舟江安刊本舟
訛州今改

卷三十第十五頁前二行蓋圈之也刊本圈訛圖
據別傳改





總校官庶吉士臣張能照

校對官學正臣李巖

膳錄監生臣于希賢